

LI STIDDRI CADENTI

Quannu la sira, cu stanchizza e suennu,
fora m'assiettu lu cielu ad ammirari,
tanti pinsera pi la testa viennu,
ma a picca a picca 'ncumincianu a spariri.

Di stiddri granni e nichì lu cielu è chinu,
chi meraviglia vidirli luccicari,
fussi troppu bellu iricci vicinu,
ma è cosa assurda putirlu realizzari.

'Nna sira chi mi vinni in menti?
Pinsari di lu cielu visitari,
e accussì fantasticannu, comu nenti,
m'accuminciavu a prepararari.

A comu fari mi misi a pinsari,
e capivu ca la cosa facili nun era,
p'arrivari in silenziu e nun disturbari,
avia a brillari commu na stiddra vera.

D'argentu tutta quanta m'addubbavu,
e brillavu, tantu ca lu specchiu nun vidiva,
tutta a 'nna vota l'uecchi m'abbagliaru,
e 'na stiddra luminosa mi diciva:

"Unni vuo iri tutta sula nicareddra,
tu nun sa cuemu s'arriva 'n cielu,
granni è l'universo, nun è na vaneddra,
acchiana, nun timiri niammu a vuelu."

Si vi l'avissi a diri veramenti,
tanticchia 'ncuminciavu a preoccupari,
ma la stiddra mi liggì la menti?
comu facia a sapiri, iu chi vulia fari?

E ad acchianari 'ncuminciammu pi ddra via,
meravigliata e curiusa di capiri
drro 'ncapu nnì lu cielu chi succidiva,
si chissu era lecitu sapiri.

Miliardi di stiddri granni, medi, nicarieddri,
tanti persuni mi parianu, 'nchiffarati,
tutti bianchi, luccicanti, bieddri,
e tutti mi taliavanu miravigliati.

Cu curriva, cu jucava, cu arridiva,
tanta festa era dedicata a mia?
chi emozioni ! comu mi sintiva?
'ntrusa e di disturbari tutti timia.

'Nà cosa straordinaria era viaggiannu,
quantu cosi si putivanu ammirari,
vidiri l'antra faccia di lu munnu,
nun e' a tutti ca pò capitari.

Tutta la terra si putia taliari,
mari, munti, jumi, laghi, prati,
era 'mprissiunanti putiri custatari,
cuemu strani siemmu e mala arragiunati.

Droga, carusi piersi, assassini, delinquenti,
ma chi munnu è chissu? mi vinni di pinsari,
e pigliata di curaggiu dissi 'ngenuamenti:
" stiddruza mia, ma chi putiemmu fari? "

"Lu sa quanu li stiddri su cadenti?
tutti cuntenti siti vuantri di la terra,
e tutti l'uecchi a lu cielu 'ntenti,
esprimiti un desideriu ca s'avvera.

Amica mia, vera sta storia è,
la stiddra cadi pi putirivi aiutari,
curri immediata unni bisuegnu c'è,
spirannu sempri di chiddru chiestu realizzari.

Ora ca t'accurgisti di chistu munnu piersu,
facili nun è pi tia turnari,
ti puezzu diri resta cca' 'nni l'universu,
ma tu lu sa, nun si po' fari.

Lu Patri Eternu a nuantri s'amminta',
pi fari luci 'nni li vostri menti,
e lu sguardu nni l'immensita'
pari ca vi fa sempri esseri cuntenti.

Ogni sira 'n-ucchiata 'n cielu prima di durmiri,
pircì ognunu di vuantri avi na stiddra,
tutti li desideri si puennu esaudiri,
pinsannu a Diu e taliannu ad iddra.

Fussi bellu si 'n cielu tutti tutti putissivu viniri,
ora ca scinni 'n terra, a tuttu l'ha cuntari,
basta sulu spirari e cridiri,
ca li stiddri pi tutti puennu luccicari.

Doppu sti paroli 'nni salutammu,
tantu dispiaciuta lassari la stiddruzza mia,
cu tanta emuziuni n'abbrazzammu,
nun mi puezzu scurdari chiù ddra luminusa via.

Benedetta!

Caniattì Ottobre 2007